



Iesus en l'aage de douze ans s'est arresté au Temple, où Ioseph & sa Mere l'ont trouvé entre les Docteurs.

L'ENFANT Iesus croissoit, & estoit fortifié d'esprit, remply de sapience, & la grace de Dieu estoit en luy, Ioseph & Marie alloient tous les ans en Ierusalem à la Feste de Pasques : Or Iesus estant venu en l'aage de douze ans, alla avec eux, & les iours d'icelle Feste estans acheuez, eux s'en retournans, Iesus demeura en Ierusalem, dont son Pere ne sa Mere ne s'aperceurent point : mais estimans qu'il estoit en leur compagnie, ils cheminerent vne iournée, & le chercherent entre les parens. & ceux de leur connoissance, & ne le trouuant point s'en retournerent en Ierusalem le chercher ; & aduint que trois iours apres ils le trouuerent au Temple assis au milieu des Docteurs, les escoutant, & les interrogeant : & tous ceux qui l'oyoient s'estonnoient de sa sapience & prudence de ses réponses ; & sa Mere luy dit, Mon fils pourquoy vous estes vous ainsi separé de nous ? vostre Pere & moy vous cherchions avec tristesse & douleur. Et Iesus leur dit, Ne sçauiez-vous pas qu'il me faut estre occupé aux affaires de mon Pere ? mais ils n'entendirent point ces paroles. Adonc il descendit avec eux en Nazareth, où ils faisoient leur residence ; & leur obeïssoit.